



TEZAU LITURGIC

6 IULIE

**SLUJBA
SF.CUVIOS-MUCENIC
TEODOR
BOGOIAVLENSKI
DE LA
BALAȘOV**



MOSCOVA, 2000



6 июля

Служба преподобномученику Феодору Богоявленскому

На велицей вечерни

На Господи возвах: стихиры, глас 5.

Подобен: Радуйся:

Радуйся, Феодоре, / отче наш пречестный, /
претерпевый за Христа муки многоразличныя, /
и победивый врага лукавство кротостию. //
Моли Христа Бога о почитающих память твою.
Радуйся, поем тебе отче Феодоре, / в победныя
ризы видяще тя облеченна, / во Царствии
Божии ликующа. // Моли победу Дающего о еже
спастися нам.

Радуйся, победу над супостатом одержавый, /
радуйся, в лице мучеников ныне
торжествующий, / жизни вечной наследниче
праведный, / твою память ныне празднующе,
// молимся помиловаться душам нашим.

Слава, глас 6:

Отче священномучениче Феодоре, / собравшеся
во святем храме твоём, / и твою память
велегласно торжествующе, / твоим подвигом
дивящеся, / хвалу тебе Увенчавшему по силе
приносим, / и тебе славяще молим: // не остави
в молитвах паству твою.

И ныне, Богородичен, глас тойже:

Кто Тебе не ублажит Пресвятая Дево; / кто ли не
воспоет Твоего Пречистаго Рождества; /
безлетно бо от Отца возсиявый Сын
Единородный, / Тойже от Тебе Чистыя пройде, /
неизреченно воплощся: / естеством Бог сый, /
и естеством быв Человек нас ради, / не во двою
лицу разделяемый, / но во двою естеству
неслитно познаваемый. / Того моли Чистая,
Всеблаженная, // помиловатися душам нашим.

На стиховне стихиры, глас 5:

О предобрый наш пастырю, / и преславный
Христов мучениче, / веры христианския
похвало и утверждение, / Царствия Небеснаго
праведный наследнче, / ныне радуйся поем ти,
// почитающе память твою.

Стих: Честна пред Господом / смерть
преподобных Его.

Христов воине добропобедный, / на брань с
супостатом от мира пришедый, / и подвигом
добрым себе предпочистивый, / и землю кровию
своею обагривый, // ныне ликующи моли Бога о
нас.

Стих: Священницы Твои оденутся в правду, / и
преподобнии Твои возрадуются.

За Христа муки претерпел еси, / кровию своею
Церковь утвердил еси, / венец Царства себе

стяжавше, / наследник живота вечного явился еси, // молися быти нам в невечернем дни Царствия Христова.

Слава, глас 5.Подобен: Радуйся: Радуйся, священномучениче, / венцом победным увенчанный, / сораспеншися бо Христу совоскресл еси ему, / темже в вечной славе предстоиши. // Моли Жизнодавца и о нас грешных.

И ныне, Богородичен, глас тойже: Обрадованная, ходатайствуй Твоими молитвами, / и испроси душам нашим множество щедрот, // и очищение многих прегрешений, молимся.

Тропарь, глас 3:

Церкве Русския столпе непоколебимый / благочестия правило, / жития евангельского образе, / преподобномучениче Феодоре, / Христа ради пострадавый даже до крове, / Егоже моли усердно, / яко Начальника и Совершителя спасения, / Русь Святую утвердити в Православии // до скончания века.

На утрени

Величание:

Величаем тя, / преподобномучениче Феодоре, /
и чтим подвиги и страдания твоя, / ты бо
молиши о нас // Христа Бога нашего.

Псалом избранный:

Крепость моя и пение мое Господь, и бысть мне
во спасение.

Отступите от мене вси делающие беззаконие,
яко услыша Господь глас плача моего.

Помощь моя от Бога, спасающего правых
сердцем.

По 50-м псалме стихира, глас 6:

Егда в жертву живую / Господу себе самаго
принесл еси, / преподобномучениче Феодоре, /
отверзошася ти врата правды, / и ныне, вшед в
Царство Небесное, / престолу Бога Живаго
предстоиши, // хвалу Ему с лики новомученик
Российских возсылая.

Канон, глас 6.

Песнь 1

Ирмос: Яко по суху, пешешествовав Израиль /
по бездне стопами, / гонителя фараона / видя
потопляема, // Богу победную песнь поим,
вопияше.

Господа возлюбил еси тепле отче Феодоре, и к Тому притекл еси, вся мирская ни во чтоже вменивый, и в пустыню духом удаливыйся, темже врага восстания доблестно сокрушил еси. Искушаемь врага злобою отче Феодоре, тяготу злобы человеческия чрез все житие Твое пронесл еси. В любви же Господней крепость обретаючи, вся претерпел еси яко воин Христов добропобедный, злобу человеческу любовью Божиею победил еси.

Слава: Велий еси, Господи, и дивен во святых Своих! Взываем ныне братие, память мученика Христова Феодора празднующе, зряще того в победный венец облеченна и врага победивша. И ныне: Радуйся, Одигитрие, со страхом ти вопиющих радости сподоби, Мати сущия Радости, избавляющи скорбей всяческих, и всех помилуй, к Тебе прибегающих.

Песнь 3

Ирмос: Несть свят, / якоже Ты, Господи, Боже мой, / вознесый рог верных Твоих, Блаже, / и утвердивый нас на камени // исповедания Твоего.

Радуйся, радуйся, Христов мучениче, радуйся пастырю стада Христова предобрый, ликуй на Господа уповавый и тем не посрамивыйся. Радуйся, доброхвальне Феодоре.

Человецы на Господа и Церковь Его враждоваху иногда, и ты от тех претерпел еси муки многоразличныя Феодоре, на Спаса твоего Господа уповаючи, не посрамился еси, но низложил еси врага злобу, блаженне.

Слава: Ликуеши ныне в небесных обителях веселящися, на Бога бо изрядным упованием сладость живота вечнаго стяжал еси и сонму святых Христовых сопричислен еси.

И ныне: Златую Тя Стамну и Свещник, и Жезл и Трапезу, Чистая, призываем, Одигитрие, и глас, еже радуйся, Тебе присно привношаем, с сими же имени.

Песнь 4

Ирмос: Христос моя сила, / Бог и Господь, / честная Церковь / боголепно поет, взываючи / от смысла чиста, о Господе празднуючи.

Не убоялся еси убивающих тело, душу же убить не могущих, но попечение имел еси о духовнем житии твоём, усердно Господу послужил еси и страхом Божиим страхования житейская препобедил еси.

Егда приидет Господь Судия Праведный коемуждо по делом его воздати, молися за окаянных и грешных человеков, мучениче отче наш Феодоре, да помилует нас Господь.

Слава: Покайтесь — вопиял еси предобрый наш

пастырю, о мучителях твоих милосердующи и спасения им ищущи, тие же крепости веры твоея бояхуся, аще и умучен от них был еси, но не посрамился еси, тии же погибель себе уготовиша.

И ныне: Радуйся, Еяже величия вся тварь славити убо спешит по достоянию, но не возмогает, Одигитрие, и сего ради зовет Ти: радуйся, Владычице, Боговместимое Жилище.

Песнь 5

Ирмос: Божиим светом Твоим, Блаже, / утреннюющих Ти души любовью озари, молюся, / Тя вести, Слове Божий, / истинного Бога, // от мрака греховнаго взывающа.

Во обители небесныя духом устремился еси, отче Феодоре, таже Господу усердно поработав живот вечный и блаженный унаследовал еси. Сего ради и мы тебе взываем: молитвенниче наш и пастырю, не престай ходатайствующи за нас.

Сладость живота вечнующаго в Бозе еще в земном житии твоём вкусил еси, мучениче, темже вся доблестно претерпел еси. Ликуй ныне во обителях райских, выну пред лицом Божиим веселяся.

Слава: О Пасха велия и таинственная, Христе, живот и Царствие верным дарующий и победою мученики Своя венчающий! Сподоби и нас

радости живота небеснаго насладитися.
И ныне: Радость неоскудную Тя разсмотряюще
яко море, Отроковице, Одигитрие Девице,
радующеся вси, радуйся, вопием Ти: и поюще,
Божественных даров невидимо присно от Тебе
ожидающе.

Песнь 6

Ирмос: Житейское море, / воздвизаемое зря /
напастей бурею, / к тихому пристанищу Твоему
притек, вопию Ти: / возведи от тли живот мой,
// Многомилостиве.

Страдания и муки многоразличныя чрез все
житие твое пронесл еси, блаженне Феодоре:
скитания, поругания, лишения, к сим же и злобу
человеческу и клевету, на тя возводимую, но не
оставил еси любви Христовой.

Искушаемъ быв от врага, скорби и искушения
терпел еси, боговенчанне Феодоре. И вся
прилоги лукавыя претерпевал еси на Бога Спаса
твоего упованием неуклонным, темже и спасся
еси.

Слава: Хотя от спасения тя отрешити диавол
искушаше тя, доброхвальне Феодоре, но
посрамлен и низложен от тебе отыди, упованием
бо на Бога вся претерпел еси.

И ныне: Злата всякаго блистаема, и утра
солнечнаго светлейши, Жилище Христово,

радуйся, Одигитрие, радуйся, Девице, радуйся,
Невесто Невестная.

Кондак, глас 3:

Мирскаго мятежа удаливыйся, / добре Богу
послужил еси, / во дни же гонений на Церковь
Русскую / кровь Твою за Христа пролиял еси / и
страданьми твоими землю нашу обагрил еси. /
Темже молися преподобномучениче Феодоре, /
сохранитися ей в православии и благочестии //
до скончания века.

Песнь 7

Ирмос: Росодательную убо пещь / содела Ангел /
преподобным отроком, / халдеи же опаляющее /
веление Божие, / мучителя увеща вопити: //
благословен еси, Боже отец наших.

Праведный гнев от народа Своего отвратити
Господа моли, Феодоре, яко Милостиваго и
Праведнаго, но от всякаго зла да сохранимся
твоими молитвами и Бога всех милующего
заступлением.

От богоборцев претерпел еси муки
многочисленные, Феодоре, но в Господе имый
утверждение, яко отроцы в пещи неопаляеми,
скорби претерпеваючи спасся еси от смерти,
живот стяжав вечный.

Слава: Да восхвалят небеса и земля Господа,

отцов Бога Препрославленного, и мы да поклонимся Тому и воспоем: благословен еси во храме славы Твоея Господи.

И ныне: Радуйся, радуйся, кораблем Одигитрие, нужно плавающим, избавляющи верных, и всем избавление от всякия скорби, и недуги пестротныя и медленныя разрешающи вскоре.

Песнь 8

Ирмос: Из пламени преподобным росу источил еси / и праведнаго жертву водою попалил еси: / вся бо твориши, Христе, токмо еже хотети. / Тя превозносим во вся веки.

Благословите вся ангели Господа, яко Творца и Вседержителя Крепкого. Да восхвалится Господь дивный в делах Своих. Вся дела Господня Того пойте и превозносите во веки.

Господним чудесем дивящися, Тому славу выну возсылаал еси, Феодоре отче наш, и нас ныне сподоби пети неосужденно: вся дела Господа пойте и превозносите Его во веки.

Слава: Благословим, человецы, Господа, Того силе дивящися, Сей бо спасает верных Своих и посрамляет враждующих Нань, и яко Бог Всемогий вся строит ко спасению, Того дела пойте и превозносите во веки.

И ныне: Радуйся, жен всех славо, храме преосвященный Бога нашего. Радуйся,

Одигитрие. Радуйся, Душеспасительная всей вселенной. Радуйся, покрывающий Облаче, небес Ширшая. Радуйся, Мироположнице, Божественного мира полна.

Песнь 9

Ирмос: Бога / человеком невозможно видети, / на Негоже не смеют чини ангельстии взирати: / Тобою бо, Всечистая, явися человеком / Слово воплощенно, / Егоже величающе, // с небесными вои Тя ублажаем.

Власти богоборныя яко Ирод окаянный спасение верных зряще гневом распыхався, и отроцев Господних избиваше, но посрамилися еси сильныя, со престол низложенныя, смиренныя же ныне ко престолу Царя вознеслися есть. Смирением своим от Господа милостыню стяжавый, отче Феодоре, ныне венцем живота венчался еси, темже радуешься ныне в Бозе спасение обретый и за ны непрестанно молишися.

Слава: Не остави в молитвах паству твою, дивный мучениче, преподобне отче, скорый молитвенниче. Твоему присному заступлению за ны пред Господом дивящися, Тому хвалу по силе приносим и тебе величаем, и молим: не остави нас, молитвенниче и пастырю наш.

И ныне: Лето живота нашего прочее сохрани

неврежденно поможением Твоим, Дево
Отроковице, и сподоби конец благий получитьи
нам, воспевающим Тя и зывающим: радуйся,
Всеблаженная, Богородице Чистая, Одигитрие.

На хвалитех стихиры, глас 8.

Подобен: О преславнаго чудесе:

О преславнаго чудесе! / Красуется ныне Церковь
Русская, / кровь святых мученик имуще крепкое
утверждение. / И церкви Божии сонму новых
российских мученик равночисленнии / свет
миру Христовой веры выну являют. / Темже
днесь воспоим доброго Христова мученика, /
память его светло торжествующе, //
добропобеднаго Феодора.

Слава, глас и подобен тойже:

О преславнаго чудесе! / Воспоим днесь Христа
Бога братие, / во храме дивнаго Феодора
сошедшеся, / того бо имамы вернаго
наставника, / и пастыря доброго, и любви
учителя, / и крепкаго Божия служителя. / Сей
бо есть воистинну дар Божественный, /
Владыкой всех нам туне дарованный. // Того
восхвалим.